



TAPAK 8

Aung San Suu Kyi maneni sota ayutsü telemtetba agi

TAPAK 10

Gopichand den kecha mangatettep mali: Sindhu

VOL. XVIII NO. 123 (ADOK 123) DIMAPUR

SANGTENNÜ (TUESDAY) TSÜKLAI (FEBRUARY) 16, 2021 ₹ 5.00

State sorkari Naga yimten olemtep indang o balala jembir: NPF

Kohima, February 15 (TYO): State sorkari India sorkar aser Naga yimten teloktem tsüngda olemtepba atema o balala jembir ta Naga People's Front (NPF)-i aitsüogo.

"February 12, 2021 nü Nagaland Governor R N Ravi-i o jembidang Naga teloktem den olemtep tembangogo ta ashibaji February 9 nü Ministry of Home Affairs-i Parliament nung olemtep tatemleni arudar ta ashiba den meputeper, anungji iba onük jangjashijang" ta MLA Imkong L. Imchen-i CM Neiphiu Rio dang ashi.

"Olemtep tembanger asü mesüra Governor-i Assembly aser Naga nunger dang tiyazü jembir?" ta Imkong-i asüngdang.

Governor-i ashiba ama olemtep tembanger süra, kechi koma tembang? Naga yimten tebilemtsü tembanger süra Nagaland nung alirtem dang yimten koma latet'ar shiang" ta paisa ashi.

February 9, 2021 nü Lok Sabha nung Nagaland MP Tokheho Yephthomi-i asüngdangba langzüdang Union Minister of State for Home, G Kishan Reddy-i langzüba asü Nagaland Governor-i ashiba angatsü, ta MLA Imkong-isa metetdaksü.

MLA Imkong-i den yarisema MLA Yitachu-ia "kechiba Governor-i nübortem dang longjemtsü aser yimten latettsü ayongzük?" ta asüngdang.

"India sorkari Naga yimten teloktem den olemteper saka kasa mapang nung parnok dang kiralongrartem aser ozüangi memelaba teloktem ta sangoktsür. Linük kechaia telemtetba agitsü atema jembirtem dang kiralongrar mesüra ozüangi memelar ta mejembir" ta Yitachu-isa ashi.

Naga yimten tebilemtsü nung sorkar yimsü asürtemi kanga

meranga mapa inyaksü nüngdaker, saka tang aliba state sorkari ibaji meinyaker. Centre aser Naga teloktem tsüngda Naga yimtenren olemtep nung Naga MLA temi tiyongtsü nung yariteptsüla, ta paisa shisem.

Naga yimten tebilemtsü nung yariteptsü atema sorkari bangzüng aika yangluogo ta jembir saka mapa medenra kecha tajangzük mali, ta Yitachu-isa shisem.

Iba onük atema Chief Minister Neiphiu Rio-i langzüdang "olemtep tembangogo ta asüba ya Governor R N Ravi-i jembiba lir" ta ashi.

"Interlocutor-i Naga teloktem den jembiba sülen iba ya metetdaksü. Pai iba o ya mejembidang October 31, 2019 nung olemtep tembangtsü ta paisa shiogo" ta Rio-isa metetdaksü.

"Iba osang ya state sorkari masü saka interlocutor-i sangoktsü aser Naga yimten telok ajaki meteta lir. Iba osang ya Opposition Leader dena Naga nunger aikati pelashishia agizükogo" ta paisa shisem.

Governor Ravi ya governor dang masü saka interlocutor ka lir. Sorkar aser opposition züngsemtemi Joint Legislators Forum (JLF) on Naga issue ama tiyongtsü nung yaritepogo. Ajisiüaka, osang kar metongtepba ajanga NPF-i JLF nungi pila, ta Rio-isa ashi.

Ajisiüaka, TR Zeliang-i külem sangdong ka agütsütsü atema molungba aser ano October 15 nü state sorkari jatepa senden amendang lemtetba onük 7 agizükba atema tenünsang agütsür, ta paisa metetdaksü.

CM Rio-isa Opposition züngsemtem dang Mongulbarnü Naga yimten tebilemtsü dak sendakba osang jangjashiteptsü atema mapang peria angutsü ta ashi.

COVID-19 Nagaland: Nisung 97.56% taneptsü nguogo

Kohima, February 15 (TYO): Hombarnü Nagaland nung nisung ka dak danga COVID-19 aliba meputet saka nisung 15 taneptsü nguogo.

"Tanü ninung shinga dak-a COVID-19 aliba meputet. Kohima nungi nisung 15 taneptsü angü" ta Health & Family Welfare Minister, S Pangnyu Phom-i metetdaksü.

Nagaland nung nisung 12,189 rongnungi 11,892 taneptsü nguogo, ta paisa ashi.

Tang tashi nung COVID-19 puteta alir nisung 88 süogo saka parnok 10 bo tanga timtem ajanga asü. Külen, nisung 151 tashi tanga state temi ogo, ta Health & Family Welfare Director, Dr Denis Hangsing-i metetdaksü.

Nagaland nung COVID-19

nungi taneptsü angubaji 97.56% lir, ta paisa shisem.

Tang anepalurtem rongnung Dimapur nungi nisung ka dak shirangba yimya tera lir aser 57 dakbo shirangba yimya kecha mali, ta Dr Hangsing-isa ashi.

Taneptsü angurtem: Dimapur (6,329), Kohima (3,763), Mon (594), Peren (506), Tuensang (246), Mokokchung (183), Zunheboto (139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemba sample 1,28,241 tendangogo. RT-PCR ajanga sample 74,461, TrueNat ajanga sample 37,264 aser Rapid Antigen Test ajanga sample 16,516 tendang" ta Dr Hangsing-isa metetdaksü.

Assembly nung Governor onük atema o atsütep

Dimapur, February 15 (TYO): February 15, 2021 nü 13 buba Nagaland Legislative Assembly nung züngsemtemi Governor onük atema Motion of Thanks atema o atsütepba mapang agiogo.

O atsütep dang Opposition züngsemtemi COVID-19 wara mapang healthcare workers-i mapa tajung inyakba atema tenünsang agütsü, ajisiüaka parnokisa state sorkar dang healthcare infrastructure tajungba kümdaktsütsü ayongzük.

"Nagaland nung doctor, nurse aser healthcare worker tajung peria dang lir saka public-i nüngdakba ama health care infrastructure tajungba kümdaktsütsüla" ta MLA, Y. Vikheho Swu-i ashi.

COVID-19 wara ajanga agriculture sector aser aluyimertem dang kanga mejungi kongshiogo. Anungji chiyungtsü peria züsentettsü atema agri & allied sectors nung temolung agüja sentongtem renemtsüla, ta MLA Vikheho aser MLA Yitachu nati ashi.

Wara mapang School Education Department-i online class agiba atema tenünsang agütsür. Ajisiüaka, kasa mapang nung kaketsir ajak ajangzüktsü atema meta talang pilar aliba tesemtem nung internet & communication facilities tajungba nüngdaker, ta Vikheho-isa shisem.

"COVID-19 anema raraba ya külem tongpang ka liasü aser iba atema health care workers, civil societies, arogotem aser frontline workers ajak nem tenünsang agütsür" ta Leader of Opposition, T.

R. Zeliang-ia ashi.

COVID-19 wara ajanga alima ajungalen tourism industry nung kanga mejungi kongshi aser iba ajanga 2020 Hornbill Festival online ajanga dang agi, ta Tourism, Art & Culture Advisor, Khehovi Yephthomi-ia ashi.

"2019 Hornbill Festival nung nisung nisung 3 tashi aden aser iba ajanga state nung tourism renlokba sayur. Külen, Travel & Tourism Fair, Mumbai nung Nagaland nem 'Most Promising New Destination' 2019 sempet agütsüba ajanga otsü tasen ka yangluogo. Anungji, asenok ajak longjemer tourism sector ajungkettsü merangtepdi" ta paisa ayongzük.

Opposition züngsemtemi Nagaland nung healthcare tsütsü infrastructure peria maliba atema asüngdangba ka langzüdang Health & Family Welfare Minister, S. Pangnyu Phom-i "sorkar nüngdakba infrastructure inyakogo aser COVID-19 wara anema raratsü asoshi doctor, nurse, technician, scientist timba kümdaktsüiogo" ta ashi.

District Hospitals, CHC, PHC aser sub-centres nung infrastructure kanga agi tajungba kümogo aser COVID-19 tendangtsü atema Kohima, Dimapur aser Tuensang nung BSL Lab 3 yangluogo, ta paisa shisem.

Chief Minister, Neiphiu Rio-i otsü atsütepba mapang tembanga jembidang motion of thanks nung shilem agir ajak dang pelaba metetdaksü.

"Alima nung COVID-19 wara kanga dang ajungbena prokshi aser

iba atema shinga renema maliasü. Iba wara anema inyakdang, tetenzüklen metokmeperi kar ajuruogo saka healthcare workers, NGOs, arogotem, frontline workers aser sorkar department balalai mapa tajung inyakba atema tenünsang agütsür" ta Rio-isa metetdaksü.

Dzükou Valley nung morok mi noktangtsü atema sorkari kechi mapasa inyak ta Leader of Opposition TR Zeliang-i asüngdangba langzüdang, "Dzükou Valley meketa permanent Fire Control Line yangluogo, tourist tem olioraba atema foolproof surveillance system amenokogo, first responders yua lir aser technology Fire Alert System enokogo" ta CM Rio-i langzü.

Ajaki molungra sorkari Dzükou Valley ya Government Reserve Forest ka kümdaktsütsü bilemer aser iba atema Centre sorkar mesüra international agencies nungi teyari meshinür, ta paisa ashi.

Nagaland nung Power sector-i khuretem ajuruba atema Rio-isa ashiba agi "ali kibur dak sendakba tebilemtsütem ajuruba ajanga sorkari hydro power projects tembanga meinyakteter. Külen, consumer temi sen magütsüba ajanga revenue tsütsü takoksa ajurur, anungji sorkari metre reading, revenue collection maparen outsource asütsü sentong lir."

O atsütepba mapang nung Metsubo Jamir, Dr. Neikiesalie Kire, Kashiho Sangtam, Imkong Imchen, Kezhienyi Khalo, Amenba Yaden aser M. Yollow Konyak nungeria shilem agia liasü.

Select committee kati SARFAESI Act reprangshimtsü

Kohima, February 15 (TYO): Hombarnü Nagaland Legislative Assembly (NLA)-i Assembly nung select committee ka nem SARFAESI Act 2002 reprangshimtsü agütsüiogo.

Securitization and Reconstruction of Financial Assets and Enforcement of Security Interest (SARFAESI) Act 2002 ya 2006 küm Parliament nung latetba Act ka lir saka iba Act ya Nagaland nung ano mebenok lir.

Constitution of India nung Arrla 371(A) nung State Assembly-i magizük tashi Parliament indang Act kecha Nagaland nung mapa küma inyaksü makok ta lateta lir ta asüba onük nung ajemdaker SARFAESI Act 2002 mebenoker.

NLA nung Budget 2021-22 session tenzüker anogo tanabuba nung ruling aser opposition bench züngsem ajaki Assembly select committee ka nem iba Act reprangshimdaktsütsü molunga agizük.

Tanü Planning & Coordination, Land Revenue & Parliamentary

Affairs Minister Neiba Kronu-i iba Act ya Assembly nung benoka liasü.

Chief Minister Neiphiu Rio-i Act atema state sorkari bangzüng ka yangluba mebenokdang, Minister Kronu-i ashiba agi "SARFAESI Act ajanga bank aser senotsü rejutemi okadak teyari magii loan agirtem indang kiojentem atsinga agütsü melar. Ajisiüaka, Indian Constitution nung Arrla 371A (1)(a)(iv) ajanga Nagaland legislative Assembly-i magizük tashi Parliament indang Act kecha Nagaland nung mapa küma meinyaksü lateta lir" ta ashi.

"SARFAESI Act, 2002 mapa küma metenzükba ajanga Nagaland state rongsenkettsüng tsütsü tetsükdaktsü ajurur. Bank temi sen aputsüba meyipa agütsü atema inyakyim takang maliba ajaga sen aputsütsü nungnanger" ta Minister Kronu-isa ashi.

Iba Act atema olemtep dang PHED Minister Jacob Zhimomi aser Sericulture & Excise Advisor Zhaleo Rio nati SARFAESI Act, 2002 tenzüksü atema pusema jembir.

Ajisiüaka, külen Opposition

Leader TR Zeliang aser MLA Yitachu nati iba Act ya jungjung shisadanga reprangtsüla ta ashi.

Nüngdak dang süra iba Act ya Assembly nung select committee ka nem reprangdaktsü nung junger aser ano ozüng meteterem indang tebilembatem angadangtsüla, ta tenatisa metetdaksü.

Sorkari SARFAESI Act jangjangja metettsüla aser khuret aika aliba state ka nung aibelen melii Act benoktsüla, kechiyong 33% women reservation medeni Nagaland Municipal Act benokdang khuretem ajuruogo ta TR Zeliang-ia ashi.

Iba Act atema tebilemba lemsatepba ajak angadanga sülen Leader of the House aser Chief Minister, Neiphiu Rio-i Select Committee dangi abentsü atema molunga agizük.

Tatem nung NLA Speaker Sharingain Longkumer-i select committee ka dangi SARFAESI Act, 2002 abenba osang metetdaksü aser Assembly-i telemtetba magidang iba osang benoka olemteptsü ta ashi.

Police mapa agütsütsü ta shia ashiocksür ka apu

Dimapur, February 15 (TYO): Kohima nung nisung kati Police department nung mapa agütsütsü ta tiyazü nangzüker ashiocksüba atema puogo.

Iba nisung ya arishi küm 24 tain Ravozo Medeo lir aser pa ya Mission Compound, Kohima nung alir, ta PRO DEF Kohima-ia ashi.

Iba nisung yagi Police Headquarters (PHQ) nung tongti



ketdangsür ka aser district ka nungi Superintendent of Police indang signature ajizüka amshia

taila appointment letters agütsü ta bushitetogo.

Iba dak sendakba nung North Police Station nung ken o ka benokogo aser maneni bushisüngdang südar.

Kohima Police-isa nübortem dang iba ama ashikülak mapa nungi jenbua alitsü aser iba ama nisungtem indang osang police nem sangoktsütsü mepishia metetdaksüiogo.

Dimapur nung Special Handloom Expo tenzükogo



Dimapur, Tsüklai /February 15 (TYO): Deputy Commissioner, Dimapur Rajesh Soundararajan ajanga Urban Haat, Dimapur nung anogo 14 Special Handloom Expo, Sekrenyi, North East Region Textile Promotion Scheme (NERTPS) sentong

Hombarnü lapoktsüogo. Iba Special Handloom Expo ya Directorate of Industries & Commerce ajanga ayongzükba lir aser Office of the Development Commissioner for Handlooms, Ministry of Textiles, New Delhi ajanga senotsü teyari agütsü. Ola-angla amshirtem atema

senotsü aruba sabang agütsü aser handloom osettem nüburttem dang sayutsü mechi iba sentong ya ayongzük, ta Additional General Manager, DIC, Tokugha Achumi-i ashi. Iba sentong nung Assam nungi densema exhibitor 30-i shilem agir.

Army recruitment rally dak sendakba nung senden amen

Dimapur, Tsüklai/February 15 (TYO): Bhagat Stadium Rangapahar, Dimapur nung March 10 nungi March 20, 2021 tashi Army Recruitment Rally ayongzüksü aliba dak sendakba nung Deputy Commissioner, Dimapur, Rajesh Soundararajan IAS ajanga February 15, 2021 nü administrative officers, Army, police, medical, education aser danga department balala den senden ka ayongzükba mena liasü. Iba senden nung Deputy

Commissioner, Dimapur ajanga department balala dang iba recruitment rally nung duty yoktsü atema tenüngtem February 25, 2021 tashinung agütsütsü metetdaksü. Pai medical team aser police team dang recruitment agütsü aliba tesem nung anogo ter prong nung anepdang 5:00 ako nungi nikongdang 5:00 ako tashi alitsü nenshia ashi. Education team danga recruitment rally agiba mapang documents tem jangjatsü asoshi

staff tem yoktsü pai ashi. Colonel Rajesh, Director, Recruiting ARO Rangapahar ajanga ashiba agi, online registration tenzükba aliba ya February 22, 2021 tashi alitsü aser lanurtem Indian Army nung tenzüksü atema maongka agütsütsü asoshi iba osang ya maneni prokshitsüla. Iba rally tajungtiba nung takok ngua agitettsü atema department balala nungi arua yariteptsü asoshi pai maneni mepishia liasü.

District Road Safety Committee, Mkg ajanga walkathon ayongzük

Dimapur, Tsüklai/February 15 (TYO): Linük tesem ajunga nung Road Safety Month ayongzükba nung shilem ka ama District Road Safety Committee, Mokokchung ajanga February 15, 2021 nü Sewak Gate nungi Imlong Place, Mokokchung tashi Walkathon sentong ka ayongzükba liasü. Iba sentong nung DEF Mokokchung, 23 Assam Rifles, NCC Cadets

aser Run Mokokchung nungi züngsemtemi shilem agia liasü. Iba sentong nung shilem agirtem den Imlong Place nung jembiba mapang, India nung küm shia nisung meyirijang aika lenmang lendong balala nung asür, anungji road safety ya nüburt teinyaktsü ka akumtsüla, ta Superintendent of Police, Mokokchung, Vishal, IPS ajanga ashi.

Pai sentong nung shilem agirtem dang nüburttem nem road safety indang shisatsü agütsütsü tenangzükba agütsü ajungshi aser nisung takum jenti kumzüksü atema ajaki road safety awareness agütsütsüla, ta ashi. Iba Walkathon ya Sewak Gate nung Commandant 23 Assam Rifles, Mokokchung, Raj Kumar ajanga tenzükja liasü.

Assam Rifles puri Old Peren nem sewing machine ter agütsü



Dimapur, Tsüklai/February 15 (TYO): IGAR (North) kübok Assam Rifles, Jalukie Battalion ajanga February 15, 2021 nü Old Peren nung aliba tetsür tentet nem swing machine ter agüja liasü.

Iba yimtsüng ya terenlok agi anünga lir aser nüburttem timba anogoshi aayangertem dang asünung rongsenren tsütsü jenjang mejungi lir. Old Peren nung alir ajangzüksü atema sewing machine ter agütsüba

yagi parnok teyari tulu angutsü teimla nung Assam Rifles ajanga iba mapa tajung ya inyaka liasü. Security forces temi iba ama mapa inyakba atema yimtsüng nung aliba nüburttemi pelashishia agizükba liasü.

Kohima DC-i metetdaksür

Dimapur, Tsüklai/February 15 (TYO): Deputy Commissioner, Kohima, Gregory Thejawelie-i sangdong ka ajanga ashiba agi, Kohima district kübok Jotsoma By-pass junction (Jotsoma) nungi tenzükba Kigwema village tashi 2-Lane lenmang yanglutsü atema Chainage 0+000 to 0+000 nungi Chainage 43+450 (full stretch of the 2-Lane Kohima - By pass project) ya acquisition atema nungdaker.

Iba dak sendakba nung state sorkari temelaba agütsüba ama Deputy Commissioner, Kohima ya temeden akaba ketdangsür ka asünung, shia aliba tesem nung tai aputsü mesüra ashishitsü nisung mesüra telok kar danga lira, Deputy Commissioner, Kohima indang office nem iba sangdong agütsüba anogo nungi zünga anogo 30 tsüngta agütsütsü metetdaksür, ta sangdong ajanga ashi.

Nagaland Chief Minister-i State Data Centre sayatsütsü

Dimapur, Tsüklai/February 15 (TYO): National Hydrology Project (NHP) kübok yangluba State Data Centre (SDC) lapokba sentong ka Chief Engineer's Office, Water Resource Department (WRD), Kohima nung February 17, 2021 nikongdang 2:30 ako nung agütsü. Iba sentong nung Nagaland Chief Minister, Neiphiu Rio ya tongti

tesemdanger asütsü. Iba sentong nung Joint Secretary, WRD, Selichum Thongtsar menden asütsü aser Advisor, Water Resources Department, Namri Nchang aser Addl. Chief Engineer, Water Resources Department, Er. Razouvolie Kelio natia o tatsütsü jembitsü aser iba sülen tongti tesemdangeri jembitsü, ta sangdong ka ajanga ashi.

Anganwadi worker dang COVID-19 mozü agütsü ayongzük



Dimapur District Nodal Officer (Social Welfare) for COVID vaccination aser CDPO (U) Robert Odyuo nem District Hospital Dimapur nung February 15, 2021 nü COVID-19 mozü agütsüba mapang tangokba noksa nung angur.

Dimapur, Tsüklai/February 15 (TYO): District Nodal Officer (SW) for COVID vaccination, Robert Odyuo, shiba CDPO (Urban) Dimapur lir, pa February 15, 2021 nü District Hospital Dimapur nung COVID-19

mozü agia liasü. Iba mapang Robert-i Anganwadi worker aser teyarir dang sorkari angati agütsüba mozü ya agütsü ajungshia liasü. Maneni paisa social media nung olulu prokshiba nung mamangtsü ayongzükba liasü.

Zunheboto nung COVID-19 vaccination indang awareness agütsü

Dimapur, Tsüklai/February 15 (TYO): Zunheboto district kübok Sumi Baptist Church - Nito Mount aser 8th NAP, Naltoqa nung February 15, 2021 nü COVID-19 vaccination indang awareness sentong agia liasü.

aser kidangertem COVID-19 tashidak nungi kumzükba alitsü atema mozü ya agütsü ayongzük, aser frontline worker tem lendongbang nung lir, ta ashi.

Iba sentong nung Chief Medical Officer, Zunheboto, Dr. K. Akaho Sema-i nüburttem dang arua mozü ya agütsü aser maongka amajok nung mesüyidaksütsü ayongzükba liasü.

CMO, Zunheboto, Dr. K. Akaho Sema-isa awareness sentong nung shilem agirtem dang mozü ya agütsü aser social media nung iba mozü indang olulu prokshiba nung mamangtsü shia liasü.

Pai iba sentong nung Covishield mozü indang tejangja rateta ashi aser iba mozü agütsüba yimyattem sayua liasü. Iba awareness sentong nung adener ajak dang pei, pei kibong

India, Nagaland aser Zunheboto district nung healthcare workers tem iba mozü dose mezüngbuba agiba indang osang tejangja pai agütsü. Iba workshop agiba sülen shisalen sayur aser sentong nung shilem agirtem sensaksema liasü.

Lanurtem pei sasa inyakteta alitsüla: CM Pema Khandu



Deobarnü Arunachal Pradesh CM Pema Khandu-i Tawang nung Zentek Skill Development Centre lapoktsüdang agiba noksa angur. (Tawang, February 15)

Tawang, February 15 (Agencies): Arunachal Pradesh chief minister Pema Khandu-i ashiba agi, Tawang nung aruya aliba hydropower project yagi mapa ashir lanurtem nem mapa inyaktüsü maongka agütsüsü.

Deobarnü Tawang nung local MLA Tsering Tashis matsüngdang Zentek Skill Development Centre lapotsüba mapang, CM Pema-i iba osang metetdaksü.

"Lanurtem dang pei mapa nung terenlok lidaktsüsü ajungshitsüla, aji asünung ang tangar teyari magi pei sasa inyaktetba nung ka itta peria litettsü" ta Chief minister-isa

metetdaksü.

"State nung aruya aliba hydropower project tem yagi aika nem mapa agütsüsü asünung, lenla balala nung lanurtem mapa shia meteta alitsüla. State nung industrial training institute pungo lir aser teyangludak aliba pezü yakta renemtsü," ta Khandu-isa ashi.

Tarutsü nung Arunachal sorkari state tesem balala nung training reju pungo lapoktsüsü.

Tawang nüburtem atema iba skill development centre lapoktsüba mapang, Khandu-i ashiba agi, skill development atema state nung lanurtem nem sorkari maongka ajak agütsüsü.

"Tarutsü ya mapa shia meteta alir meyong lir. Tanü MLA Tsering Tashis matsüngdang Tawang nübur atema Zentek Skill Development Centre lapoktsür. Iba centre ajanga plumbing aser electrical maparen tsütsü training agütsüsü ta osang angazüka pelar aser student 60 tashi züngoksemogo," ta Pema Khandu-i Twitter nung lemsatet.

Zentek Skill development Centre den state department of skill development longjemer iba skill development centre ya tenzütsür.

Iba center nung plumbing aser electrical maparen atema student 60 shi züngoksemogo.

BJP-i RS by-election atema Biswajit Daimary shim

Guwahati, February 15 (Agencies): Assam nung Rajya Sabha menden ka indang bye-election nung Bharatiya Janata Party (BJP)-i parnok candidate asütsü atema Biswajit Daimary shimogo.

Yaküm November ita Biswajit Daimary-i Rajya Sabha MP nungi anenba ajanga iba menden tazüng aküm.

Biswajit Daimary ya 2008 nungi kümsük asemen tashi Rajya Sabha MP inyakogo. Pai Hagrama Mohilary-i aniba Bodo People's Front (BPF) tenüng nungi toktepa takok

angu.

BJP aser BPF tsüngda tesentaktep raksaba sülen Daimary-i 2020 küm Rajya Sabha menden nungi anen. Iba sülen November ita pai BJP züngsem aküm.

Hombarnü BJP indang Central Election Committee-i Biswajit Daimary shimba osang metetdaktgsü.

Taoba hopta tu Election Commission of India (ECI)-i Assam nung Rajya Sabha menden (Council of states) atema by-election ji March 1 nung agütsü ta osang metetdakja liasü.

"By-election timi agütsü atema Assam ung Chief Secretary-i state nungi tongti ketdangsur ka shima COVID-19 azüoktsü dak sendakba maparen inyaktaktsüsüla" ta ECI-i tetuyuba agütsü.

Maneni, ECI-isa iba by-election atema observer inyaktüsü Assam Chief Electoral Officer shimogo.

Iba election atema tenüng agütsüba tatembang anogoji February 18 lir aser February 22 tashi nung tenüngtem meyipa agütsü akok.

Assam nung Rajya Sabha MPA menden 7 lir.



Assam Regiment aser Indian Army indang Arunachal Scouts-i Tezpur nung 106 Air Force Squadron nung adenba sign sütepdang agiba noksa angur. Iba "Charter of Affiliation" nung Major General PS Behl aser Group Captain Varun Slaria, Commanding Officer of 106 Air Force Squadron nati sign asü. Iba sentong nung Major General PS Behl, Colonel of the Assam Regiment aser Arunachal Scouts-i Guard of Honour sema ao.

Imphal nung Ima market tanaben lapokogo

Imphal, February 15 (Agencies): Covid-19 tenokdangba ajanga ita aika shibanga aruba sülen, Hombarnü Imphal nung women's market mesüra Ima Keithel lapokshiogo.

Iba shishilembaba tesem tanaben lapokba osang ya shishilembar tetsürtem atema osang tajung lir kechiyong Covid-19 lockdown ajanga parnoki shishilembaba tsütsü kanga akoksaogo.

Manipur chief minister N Biren Singh-i Ima market indang tetsür entrepreneurs aser yokyayokjirtem den sensaksema liasü.

Ita aika iba market shibangba ajanga tetsür shishilembar tem taküm aser parnok maparen nung mejungi kongshiogo. Covid-19 lockdown agienba sülen, tetsürtem shishilembaba maparen tenzüksheettsü asoshi taoba küm August ita Manipur sorkari tetsür shishilembar 817 nem working capital loan agütsü.

Chief minister-i ashiba agi, alima ajunga asüngba lapokogo.

coronavirus mapang Ima market shibangba ajanga nübur tsüngda iba tashidak menatepba azüokteta liasü.

Covid-19 tensa tamajungdang, sorkar mapatong nung anidaka aser amalitepa aruba atema Biren-i tetsür shishilembar dang pelaba metetdaksü.

"Covid-19 tensa junga akümba den tanü nungi Imphal nung Ima Keithel tanaben lapoktetba atema pelar. Tensa asadanga March 21, 2020 nü nungi Ima Keithel shibangba atema iba tesashi wara tamajungba modaktsüi azüoktet. Iba ama timtem mapang tangatetba nung mulungsoa amalitepa inyakba atema Imas dang pelaba metetdaksür," ta Twitter ajanga N Biren Singh-i lemsatet.

Manipur kübok district balala nung Ima market 16 tashi lapoktsüsü asoshi state sorkari asalentong yangludat.

Kasa mapang, state kübok hill district tem nung tetsür market tasen tenet ta lapokogo.

Agartala nung tesayurtem lungkak ait



Hombarnü Agartala nung police tashiyim maparen anema mapa nungi anentsüba tesayurtemi lungkak aitba angur. (Agartala, February 15)

Agartala, February 15, 2021 (Agencies): January ita Tripura nung mapa nungi anentsür alir tesayurtem dak police-i tim masüba mapa inyakba anema Hombarnü Agartala kübok Rabindra Shatabarshiki Bhavan nung mapa nungi anentsür alir tesayurtem anema lungkak ait.

Tesayurtemi placard amer State indang police administration anema yimiyim ayim aser shiba tetuyuba nung ajemdaker tesayurtem dak teka sanshi ta tasüngdangba ayimoktsü.

Supreme Court ajanga recruitment inyakyim nung aibelena lir ta obendang agütsüba sülen, taoba küm March ita Tripura nung tesayur 10323 shi mapa nungi anentsü.

December 07, 2021 nungi tesayurtemi state sorkar dang parnok nem mapa agütsüsü

takhangba agüja Agartala nung lungkak aitar.

January 27, 2021 anepdang tesayurtem lungkak aitba tesem nungi police-i tashiyim amshia tesayurtem meindok.

Teayurtem parnok tejashiba sayua lungkak aita chief minister alidak tonga aoba mapang, tesayurtem senshidaktsüsü atema police-i tesayurtem dak süng (lathi-charge) agi azük aser water cannon amshi. Iba mapang tesayur 70 dak tema yiru.

"Police-i amakba mapang yirur tesayurtem mozüki anir ao. Ajisüaka, BJP MLA Dilip Das, shiba doctor ka lir, pai tanga doctor tem dang yirur alir tesayurtem anepalu mesüi yokadoktsü atema rongshi, koba meimchir shisatsü agi magizükba inyakyim ka liasü," ta lungkak aiter tesayur rongnung tongti shilem agir Dalia Das-i ashi.



TIR YIMYIM YIMOBILEM (EDITORIAL)

DIMAPUR SANGTENNÜ, TSÜKLAI (FEBRUARY) 15, 2021

INDIA NUNG HEALTHCARE RENLOKTSÜLA

- P Tiamongba Aier

India nung Gross Domestic Product (GDP) nungi public health atema 1% dang nungi tera agi dang timba endoker, ajisüaka China-i 2.9%, Germany-i 9.4% aser US-i 14.3% endoker. 2008-09 financial year aser 2019-20 financial year tsüngda India GDP nungi public health atema 1.2% nungi 1.6% tashi dang endoka aruogo. Iba yagi India nung health sector merenloker aser tia kanga mejungi lir. Linük 188 nung GDP nungi public health atema sen endokba asadanga nung India menden 170 buba nung ang aliba bushitetogo aser ibaji tangar dang taaktsüka lir. Maneni, India nung nisung 1,511 atema doctor ka dang lir aser ibaji WHO standard dang nungi kanga agi tajemba lir. WHO-i nisung 1000 atema doctor kabosa alitsüla ta lateta lir. India nung healthcare peria maliba ajanga anogoshia India nung nisung 4,300 shi asür ta Lancet-i bushitetba osang ka metetdaksüogo aser iba ya taoksatsü osang lir. Iba ajanga Covid agi shiranga asür dang nungi tanga timtem ajanga asürtem timba liasü ta kuli agütsür. Ano, Centre sorkar ajanga tentetba NITI Aayog-i bushitetba osang ka ajanga, India nung kati health atema sen endokba nungi 78% ji pharmacy aser nija mozü kitem nung endokba lir ta metetdaksüogo aser ibaji rongsenkettsüng tsütsü takoksa tulu lir. India nung public healthcare system jenjang mejungi aliba ya senotsü peria melemzüksüba agidangbo masü, saka yimtenren tsütsü telemtetba tai agiba, ochimashi inyakba aser COVID wara ama, meimchir taküm aika laluba mapang ang temolung agütsüba ajanga lir. Yaküm India nung nisung crore 1 temai COVID-19 mena aser iba nungi nisung lakh 1.55 asü. Iba wara agi aoksadaksür, Centre aser state sorkartemi pei pei yari kanga dang merangtepa public health infrastructure tajungba kümdaktsütsü merangtepa arudar. 2021-22 Union Budget nung healthcare atema Rs 2.24 lakh crore enoka lir saka iba nung health ministry atema sen balaka melemzüksü aser iba atema sasaa bilemer. PRS legislative research ajanga ashiba agi 2019-20 budget dang nungi 2021-22 budget nung health ministry nem 7% agi dang timba lemezükja lir. Union Budget nung 2019-20 atema Rs. 62,659.12 crore lemezüksü aser 2021-22 atema Rs 73,932 crore lemezükja lir. Healthcare atema sen peria melemzük yonga, taküm Union Budget nung taruba küm 6 atema PM Atmanirbhar Swasth Bharat Yojana ta ser centrally sponsored scheme ka tenzüksüba shia lir. Iba scheme kübok küm shia linük nung Rs 10,000 crore endoka primary, secondary aser tertiary healthcare dak sendakba maparen ajungkettsü ta Finance Minister Nirmala Sitharaman-i metetdaksüogo. Anungji, taküm Union Budget nung health & well-being atema Rs 2.24 lakh crore lemezüksüba atangji healthcare services atema amshira, sorkar mozü kitem tajungba akümtsü, mozü den tanga facility peria angutsü aser nisung taküm aika kümzüksü.

OLEMSABANG

KHRISTAN TAMANG, LOKTI YANGLUSHIBA ASER LAIPUTI RATETYIM

~ Dr. Imsenperong

Khristan tamang, lokti yanglushiba aser Laiputi ratet asem ya sendaktepa lir. Tanü asen lokti nung ochimashi aser teraksa züinba ya tamanger shiai pei tim teinyaktsü meinyakba agi dang masü, Laiputiratet jangja magütsütetba ajanga lir. Laiputiya lokti temenen anema nok-nü lir kechiaser Laishiba nung koba Yisu Khrista ajanga jungkai adok iba ochi o ajemdaker marangshiba agi ochimashi aser teraksa den rarateter.

Tamanger Tamang aser Alima Temelenshi

Lokti taküm kaji teti melenshir. Paul putu mesüra Laiputishir Augustine, Luther, Kiekegaard mapang kenyongi balaka. Asen otsüla-obula mesüra Clark sahab nung mapang asen putu den medemdangtsü makok. Temelenshi ulura. Yamaji tamang tangatetba kenyongi balala asür. Par mapang Laiputi ratet tanü putu nung ajakbo mapettsü, kechiaser tanü lokti tebilemtsü kenyongi balaka. Asenoki teti jembir par mapangbo tongmelang tamang liasü. Atangji tongmelang ta shitet kechiyong par tensa mapang yari lokti-libaliro kanga dang tongmelang aser tebenja mali asü. Tanübo asenoki par ama tongmelang sünüaka yamaji mesütettsü aser kari danga yamaji alitsü merangra aji lokti den meputep asütsü. Yongji Khristan yimsü ya melenshia ainba taküm aliba ka lir ta ashitsü akok, kechiaser lokti melenshiba isab nung Tsüngrem O ratettsü meranger. Khristan yimsü tamendakdakji tamang (faith) lir; Khristan temang ya ainer. Tamangba yimsüji aintsüla, meinrapang tasü, tasüji nungdak mali. Koda aintsü ta süra tamangba nung tangatetba, temetetba aser tebilemba nung alima renlokba den putepa shisa tesatempa nung melenshia aser renloka aotsüla. Tat. agi, tamanger kati lokti yanglushiba nung shilem agia maruji magitsüla ta asüba ama, mesüra sobaliba benjungbentsü nung matentsüla ta, mesüra sobaliba sobutsü sentep kidang masemtsüla kechiyong tamangeri itemji inyaka maru ta angatetbaji tanübo mapet akümer.

Khristan tamang aintsüla ta asüba ya tanga tamangba yimsü balaka küma melenshia aotsü indang jembir masü, saka yimsü tesayuba aser tangatetba ainba ajanga alima den sendaktepa aser yanglushia lokti nung temelenshi (Transformation) adokdaksütsü nükjidong lir. Khristan yimsü inyaksangshi nung tensa mapang den peta tangatetba melenshia aotsüla. Khristan yimsü nung kodanga memelenshiba ka dang lir aji "Yisu Dak Tamang Ayuba" anungji yangji ajemdaker Laiputi ratetyimji melenshia aintsüla. Khristan tamangji (faith) marakzüba nük dang. Iba dakji alaka tanga memelenshiba mali. Anungji tensa mapang ajak nung lokti tebilemtsü aser teraksa arudang tamanger kati Yisu dak tamang yur lokti nung shilem agia temelenshi bener arutsütsüla. Tamang yimsü ainba temaittsüji lokti sünepa aser merükayutsür iba jagi metettsü. Asen Naga lima tamanger agi sünga aliba lokti ka nung teraksa aser ochimashi moshia aliba jagi Laiputiratet tim magütsütetba sayur. Laiputi ratet nung tongtibangbaji Yisu Khrista dak tamang yur, pai sayuba aser inyakba ama lokti taküm asangsang nung yimjung aser temeim adokdaksür asü masü ta lir.

Lokti yanglushiba nung Khristan ka TeinyaktsüLai Tetuyuba

Tamanger ka mapajipei kija taküm tekümtet asoshi dang masü, mesüra sür külen teti masüba lima nung alitsü nükjidong dangbomasü, saka tamanger kaji Tsüngrem dak amangba ama lokti nung temelenshi adokdakja, kotak nung anisüngzüka alitsüba nükjidong asütsüla. Kodang asen Naga nung sasep nung tamanger indang jembidir kar dak alaka nisung ajak tamanger aser ajak Khristan. Tsüngrem dak tamang amangbaji teperi masü, saka lokti nung ne tamangi koda amanger yamaji mapa agi sayuba dakji sendaka lir. Lokti junga lira, iba jagi tamanger ka jenjang meteter aser lokti nung teraksa lira tamanger tangatetba nung ajema lir ta meteter. Khristan tamang ya kija indang masü (not a privatefaith) saka lokti nung koda nai inyaker iba jagi dang tamangji jangjar.

Naga nung tamanger aikati angatetbaji hopta nung gondha ishika sentepi oa temenen nangzüka, pei nungdakba aser lokti tebilemtsü shia sarasadembaiddangtamanger ta bilemer, iba jagi teperi ta bilemer. Iba tangatetba yagi tamangtem leman anasü nung aibelen adoktsür:Mezüngbuba nung, iba tamang tangatetba yagi lokti tebenja nung ajemoka temelenshi mapa inyaktsü mejangradaksür. Sarasadem agi teperi ta bilemdaksür. Tanabuba nung, tanütendak asen lokti teraksa nung teka iainyaktsüba jagi tamanger mapa ka masü ta bilemdaksür aser kari inyak nunga nüburtemi tai amaiang bilemtsür. Ya metetdi, lokti nung ochimashi mapa anema teka iainyakba jagi Yisu alima nung alidang jembiba aser inyakbaiba kuli asür. Tamanger kati lokti temenen tebilemtsü adokdangsarasademtsüba jagi dangbo meperir. Mapa malitamangji tasü, sarasadembaiddang yangko tapok nung oset enok ama dang asütsü. Au, sarasademji kanga tongtibang kechiyongsarasadem ya aseni bilemba mapa tetenzükimongjilir. Saka sarasadem kija asüba jagi ner lu inyakmar malitsü, saka sarasadem metenra nür luji tapong asütsü akok. Yisui tarutsü kotak yimli iba lima tenzük. Ochi o aser ochi mapa asoshi jembia aser inyaka lokti tentet ajaki oa lokti teraksa aser tai tuteta sayua lokti nung temelenshi adokdaksü. Lokti nung tamanger kaji tasüa masü, taküma masü ta malitsüla, saka tashikang dener, mesüra tasara (stinger) dener lokti nung shilem agitsü nungdaker.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Papua nung Khristan 3,000 densema nisung aika jenshiogo



February 11, 2021 nü Indonesia nung Papua kübok Bilogai nung aliba St. Michael Tenla ki moapu nung nisungtem adenshia aliba noksa nung angur.

February 15, 2021: Indonesia nung Papua region kübok sepaitem aser separatist telok ka na tsüngda rara adokba sülen Catholic Khristan 3000 densema nisung 5000 dak temai pei ki toktsür jenshiogo, ta Arogo lenir kati metetdaksü.

February 10 nü Intan Jaya district kübok Bilogai nung security sepaitem aser Papua Independence Organization (OPM) na tsüngda rara tenzüik aser tang tashi raradar, ta Timika Diocese nung apostolic administrator, putir Marthen Kuayo-i metetdaksü.

Telungpurtemi temelung melemi yimdaklir ka khasetba sülen anogo ana lir sepai ka dak injang khalokja yirutsüba nungi iba rara tenzüik, ta paisa ashi.

Papua nung pei ki toktsür ajenertem rongnung nisung 600 shibo Bilogai nung aliba St. Michael Arogo Tenla ki moapu nung jenoka lir.

"Iba rara manener, anungji taruba anogo ishika tsüngda ano Tenla kidang jenoker nisung timba akümtsü," ta putirisa metetdaksü.

Yimtsüng asem nungi nisungtemi pei ki toktsür anasa

aliba districts nung jenokogo.

"Onoki Tenla kima moapu nung jenoka alirtem nem chiyungtsü den nüngdak balala agütsüdar, ajisüaka Arogo kobika tashi yaritettsüar mejangja," ta paisa metetdaksü.

Yimjung alitsü aser nüburtem takoksa mangutsü atema telok anapronglai tekaraba nung rara anentsüla, ta paisa ashi.

Osangbener den jembidang arrshi küm 32 yimdaklir kati, "February 11 nü pa den par medemer kar Tenla kidangji oa jenok aser kidangi meyipa aotsü tsübur," ta metetdaksü.

Kerala nung nun ka asüba police-i bushisüngdanger



Sister Jaseena Thomas

February 15, 2021: February 14, 2021 nü Kerala kübok Ernakulam district nung Missionary Congregation of the Daughters of St. Thomas nung züngsem Sister Jaseena Thomas tasü mangngua liasü; la tasü mangkoila atuba ongken ka nung tziü atsünga alidak police-i angu.

Catholic nun tasü mangngi post-mortem agitsü atema bener ao saka tang tashi iba report ji mangu. February 15 nü la tasü mang remtsüogo aser police-i iba tatalokba bushisüngdang tenzüikogo.

Arrshi küm 45 nun ji tekolak meshidakba agi mozü tagidak liasü, ta lar Arogoi metetdaksü. Lar Arogoibo la asüba atema

shinga dak melung malemba mali saka la soeta asü asütsüa akok ta bilemer.

Pala Province nung Missionary Congregation nungi Sister Jessy Jose-i, "Sister Thomas den tangar nun ka küm 16 tejaklen gari lendong ajuruba sülen la tekolok tera meshidaki aküm. Iba lendong nungji la medemla jibo asü," ta metetdaksü.

2004 küm Sister Thomas aser lar medemer nun na bus ataba mapang nung gari ka kanga kera arur tena dak tsükokja liasü.

"Iba tatalokba ajanga la shisatsü tera meshidaki aküm. Tesüiba küm 10 tashi la medical

treatment tagidak liasü," ta laisa metetdaksü.

Official osang ajanga ashiba agi, Convent nung nun tem anepdang chiyungba mapang nungbo la liasü saka anüngdang chiyungba mapang nungbo la maru.

Parnoki la bushi saka manguba sülen police nem iba osangji metetdaksü. Iba sülen police-i la tasü mangngi tziü nung apong daka lia angu.

Iba sülen Missionary Congregation-i sangdong ka ajanga, "Yimlibilema social media aser tanga sabang balala ajanga olulu meproksü mepishir," ta metetdaksa liasü.

Save our Sisters (SOS) nung convenor, Riju Kanjookaran-ibo, iba tatalokba ya jungjunga bushisüngdangtsü nüngdak ta ashiba den külemi Missionary Congregation-i la tekolok meshidaki liasü ta ashibaji ashishir.

Riju-i, "Atangji la shisatsü meshidak asü nungbo kechiba la nurse ama mapa inyakdaksü?. Tanabuba nung koila atuba tesemji kanga tarok, anungji la tasü mangngi mapang talangka tziü tema nung apong daka malitsüla," ta metetdaksü.

Osang angazükba agi, Kerala nung nun ka asüba shia loktiliba nung melung melemtep aser mangatettep adoker.

ANOGO ABEN TSÜNGREM DEN

Meimchir Taküm: Tamzüksü Mapatong Ka
Rom 8:28-39

Tsüngremi ashi, "Ne tetsüng nung tsüngsem semzü kang, kechiyong kong na noktaka lir aji temeshi lir." Anitet 3:5

Midian arem nung Mosa süngsem rong aruba anasai oya alidang, Tsüngrem O-i pa songtem. Tsüngrem tena aliba ajanga Mosa noktaka aliba liji temeshi kümdaktsü.

Tsüngrem atendak mapang ajak nung aji inyaktsü. Tanü asenoki rungya aliba süngsem anasai maoer, saka tamzüksü mapatong ka: meimchir meshitetba, aliji Tsüngrem taküm aser tasü madak Kibur ama pa meyong lir. Tanür raksa endokba mesüra soeta asübaji temeshi li raksaba lir. Mosa dang Tsüngremi ozüng agütsüba ama asenok dang tsüngsem semzüksü ashir.

Tanü asenoki tamzüksü mapatong anasai koda aor iba tongtipang mapa ka lir. Tsüngrem meimchir shia taküm kechi jaka nung toktsür ibaji bilemtetbaji teyari tulu lir, tejangja pa sasa ataktetter par chir, Yisu Khrista mesoeti, asenok asoshi agütsü. Tsüngremi asenok meimchir taküm jenjang tulu nung züngshia kija taküm shia alangzüksü asoshi pei chir agütsü. Asenok tsüngsem semzüksüba dang masü tamzüksü mapatong nung akanga noktaksüba kuliji ibai lir.

O Kibuba, onok taküm pelar, onoki tangar taküm asoshia züngshidakjang; Yisu tenüng nung, shiba ajak tekümtet asoshi azü tokshi. Amen.

Arogoi UK dang Myanmar nung democracy atema yaritsü mepishir

February 15, 2021: Arogo lenirtemi UK sorkar dang Myanmar nung democracy alitsü atema yimtenren tsütsü nungi yaridaktsüner, ta mepishiogo.

Taoba hopta Myanmar nung sepaitemi State Counsellor, Aung San Suu Kyi den nüburtemi shimtetba lenirtem aika apuba sülen emergency sangdonga sepaitemi küm ka yimsüsütsü.

Church's General Assembly Moderator, Dr Martin Fair aser Presbyterian Church of Ireland (PCI) nung Moderator, Dr David Bruce nati UK Foreign Secretary, Dominic Raab dang Myanmar nung democracy beshitsü atema tiyongi ia inyakdaksüner, ta mepishi.

Arogo lenir anati shidi ka ajanga Raab dang, 1948 küm tashi Myanmar ya British nung yimsüsüba kübok liasü aser linük ana akhidang nungi tesendaktep lir, anungji Myanmar nung temelenshi atema yimtenren tsütsü nungi inyaktsüla, ta shia lir.

Tenatisa Raab dang yaküm November ita nung agiba election ji akhümtsübutsüla, ta ashi.

Yaküm election nung Suu Kyi-i aniba party- National League for Democracy-i takok ngua liasü.

"February mezügnü (Feb 1) sepaitemi tashi tali amshiba osang angashia onok aoksar, kechiyong onoki PCM (Presbyterian Church in Myanmar) nung onok medemertem atema tebilemtsü

katsür aser General Min Aung Hlaing-i yimsüsüba atema tebilemtsü katsür," ta kasa shidi nungjisa shia lir.

Küm 49 tashi sepaitemi Myanmar yimsüsüa aruba sülen 2011 küm nung ang tembanga liasü.

"Tesüiba küm 10 tsüngda nüburtemi temeden amshitetogo, yimtenren nung jenjang tajungba ngutet aser rongsenkettsüng jenjanga tajungba küma liasü," ta shidi nung shia lir.

"Rohingya nunger tia ajanga Myanmar nung nisung ajak kasa mezüngshiba temaitsü sayur," ta Arogo lenirtemisa metetdaksü.

Myanmar linük temzüng Arrla 417 ajanga emergency mapang nung tashi amshia yimsüsütsü atema sepaitem nem tashi agütsür. Osang angazükba agi, coronavirus wara agi kongshiba den külemi yaküm November ita nung agiba election nung ochimashi tulu liasü ta shia sepaitemi linük nung emergency sangdong. Yaküm November ita nung agiba elections nung Suu Kyi'er party-i House anaprongla senteper menden 476 nungi menden 396 tashi nung takok ngua liasü. Iba sülen February 1, 2021 nü Parliament tenzüksü ghonda ishika dang lia anepdang züngia sepaitemi lenirtem pua emergency sangdong. Küm ka emergency tembangba sülen ang sepaitemi election ayongzüka agitsü, iba sülen takok angurtem nem yimsüsüba menden agütsü.

OLONG PAITEP # 5726

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T _ _ _ lu - (3)
10. Takdang temalen - (9)
11. Tesa _ _ _ a - (3)
13. Ajungbena temulungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

1. Reprangdaksü - (4)
2. _ _ _ ur - (3)
4. Kiojen yangludak - (6)
6. _ _ _ _ _ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. _ _ _ _ adenshi - (4)
14. Tsünusenbongtsü adokdak - (3)

OLONG PAITEP # 5725 TELANGZÜBA

TIPIEN :

1. Kasa, 6. Rangben, 7. Mait,
9. Poktet, 11. Ati, 13. Atasa, 16. Rür,
17. Rajang, 20. Lanu, 24. Nüngjem,
25. Süra.

LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita, 10. Tar,
12. Tinu, 14. Salem, 15. Aja, 18. Anünü,
19. Taju, 21. Ano, 22. Onü, 23. Kua.



MR ALOK ASER ENGINEER-4

- Alok** - Engineerba, tang koba aphu temdangsü sorkari yangluang ta temelaba agüja lir ibaji ozü li anungji kü nem mapa inyaksü temelaba (work order) agujangma.
- Engineerba** - Kecha objection mali nung, Alok nü nem agütsür... work order nung aliba amaji metong nung feet 100, lenden nung feet 20 aser temelem (height) nung inch 6 ta shitak yangluang?!!
- Alok** - Engineerba mapa kanga junga renemogo tereprangi arung.
- Engineerba** - Alok ya koda asü? Nai kanga dang mejungi inyakogo, metong nung 50 feet dang, lenden nung 10 dang aser temelem nung 3:dang, objection na kodanga bill mangutsü!!
- Alok** - Engineerba na ya kechi sa sayatenyar?? Ni kanga junga shisa kaa inyakogo!!
- Engineerba** - kechi sayatenya adi...sala!!!
- Alok** - Engineerba, mangadangsüngi mashie nung ainsa taitja...yamai adi..50ft, to tenem nung alir nem tax agütsü, feet 10ji lenden nung alir nem tax agütsü aser height nung inch asem ji asen Arogo nem ter shilem aser temoatsüba tenla agütsü aja Engineerba!!

(Maneni asüng adok....)

TANÜBO NAI LANGZÜANG

Q. Kodang MCA21 Version 3.0 sayatsü?

A.Oct 2021

B.Sep 2021

C.Aug 2021

D.Jul 2021

===== (Taruba adok nung onoki langzünsü)

YASHI ADOK TELANGZÜBA : Africa and Australia



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?

INDIA NUNG SALE TIMTIBA ALIBA BRAND TEM: JANUARY 2021

RANK	TWO WHEELER OEM	JAN'21
1	Hero MotoCorp	4,67,753
2	Honda	4,16,716
3	TVS	2,05,216
4	Bajaj Auto	1,57,404
5	Royal Enfield	64,372
6	Suzuki	57,004
7	Yamaha	55,151
8	Piaggio	6,040
9	Kawasaki	161
10	Triumph	62
11	Mahindra Two Wheelers	26
12	Harley-Davidson	23

****OEM (Original Equipment Manufacturer)**

SUDOKU # 5768

		9	6		2			8	5	7	6	9	1	2	4	3
5	2			7	1	6		4								
8	6						7									
	3	8			7	4		2	7	6	3	5	1	8	9	2
6		5	1	2	4	8		7	1	9	4	7	2	6	8	3
	4		3						5	8	2	3	4	9	6	1
	1		7		5				3	1	8	9	7	5	4	6
			2	4	3		1		6	4	5	8	3	2	1	7
2	5	6	8		9	7		3	2	7	9	1	6	4	3	5

TELANGZUBA # 5767

OJANG LUTEP # 5314

KJ ONNÜIDG	:								
BOAKARI	:								
KÜTAM	:								
NGNU	:								
KOKMMOIN	:								
UAKAJURA	:								
ÜNGALIZ	:								
GTTONETTSÜSA	:								
ANGLROKER	:								
ERASEM	:								

OJANG LUTEP TELANGZÜBA # 5313

YIMJAK NUNG MAKSÜ ANGUDANG NUNGIBO KIBOK
NUNG MAKSÜ ANGU TAJUNGBA

TAN HOPTA ATEMA - KOMA SÜLA ?

Q. 1963 küm 1st December sülen Nagaland nung arua alirtem nem Nagaland nung dokan amentsü, taxi aser auto rickshaw anishitsü permit magütsü nunga koma süla?

Olong 20 shi nung February 19, 2021 tashi nung iba telangzuba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzubatemi taruba Honibarnü adoktsütsü.



Thiruvananthapuram, February 15, 2021: Hombarnü Kerala yimtiba, Thiruvananthapuram nung Muslim Youth League (MYL) züngsemtemi oshimashi anema longkak aita State Secretariat-i aotsü merangdang police-i nokdangba noksa nung angur.

March ita nungi arrshi küm 50 temapur nem vaccine agütsütsü

New Delhi, Luchii/February 15 (Agencies): Hombarnü Union Health Minister, Harsh Vardhan-i, India linüki March ita nungi tenzüka arrshi küm 50 ser temapurtem nem coronavirus vaccine agütsütsü, ta metetdaksü.

Hombarnü New Delhi nung osangbenertem den jembidang Union Minister-i, coronavirus wara anema health sector-i meranga raraba atema tenüngsang agütsü.

Linük tesem ajunga shibangyonga aser tensa majungyonga India linüki meranga inyakba ajanga coronavirus vaccine ana yanglutetogo, ta metetdaksü.

"March ita nungi arrshi küm 50 ser temapurtem nem

vaccines agütsütsüsa maongka angutsü. Ajisüaka nüburtemi maneni COVID anema tetuyubatem benshitsüji tongtimbang, koba dang ni social vaccine ta ajar," ta pai metetdaksü.

Tesüiba anogo 7 nung district 188 nungbo shinga dak coronavirus tashidak meputet, ta pai ashi.

COVID-19 vaccine anema olulu prokba dak sendakba nung pai, "Covid-19 vaccine agiba agi nisung ka danga asüba osang mali. Vaccine agiba sülen asüba tatalokbatem bushisüngdangdar. Stakeholders-i Covid vaccine agiba sülen symptoms bushisüngdangdar," ta metetdaksü.

"Frontline workers shilem

80-85 vaccine agiogo aser linük 20-25 shi nung item vaccines angutsü. Vaccine 18-20 shi preclinical, clinical aser advanced stages nung lir aser taruba itatem nung itemji renemtsü," ta pai metetdaksü.

Harsh Vardhan-i, "Alima nung 'Health for All' mangdang ataloktsü asü nunga iba model ji India nung yanglutettsü ta ni amanger. Asenoki akhidang medical shisatsü, health facilities aser systems ajak amshiba ajanga alima atema model ka yanglutettsü," ta ashi.

Linük nung COVID-19 case ajak agi million 10.9 jungogo; February 14 nüa linük nung nisung 12,194 dak coronavirus putet aser iba tashidak agi nisung 92 süogo.

Aluyimba ozüing dak sendakba nung SC ludeni agri mongintem ajuru

New Delhi, February 15 (Agencies): Aluyimba ozüing tasen asem dak sendakba nung Supreme Court-i tentetba committee-i, parnoki shisashirtem aser aluyimba dak sendakba nung mongintem ajurua shisa lemsatepogo, ta metetdaksü.

Tang tashi nung iba committee-i senden tenetben menogo. Züngsem asem aliba committee-i online ajanga dang masü saka mongintem tsüngdong oa ajurua shisa lemsatepa arudar.

Committee-i sangdong ka ajanga, Hombarnüa parnoki video conferencing ajanga

shisashirtem aser mongintem den senden menogo, ta metetdaksü.

"Video conferencing ajanga shisashir aser mongin teneti committee züngsemtem den senden menogo," ta sangdong nung shia lir.

Senden nung committee züngsemtemi shilem agirtem dang aluyimba ozüing tasen asem dak sendakba nung tebilemba lemsateptsü asüngdanga liasü; yamaji parnoki parnok tebilemba onüktem lemsatepogo, ta sangdong nung shia lir.

January 12, 2021 nü Supreme Court-i ita ana atema

aluyimba ozüing tasen asemji mebenoki atatsü tuyu aser committee dang mongintem den senden mena shisa lemsatepba sülen ita ana tsüngda report agüjang, ta tuyua liasü.

Punjab, Haryana aser Uttar Pradesh densema state balala nungi aluyimertem Delhi arrtsülen adenshia Centre-i benokba aluyimba ozüing tasen asemprong agienang, ta takhangba agüja ita asem jungnüa longkak aita arudar.

Tang tashi nung Centre sorkar nungi minister tem aser aluyimer union 41 tsüngda senden 11 ben menogo saka telemetba magiteter.



Bhopal, February 15, 2021: BJP lenir aser taoba mapang Union Minister asür Arif Baig sor küm 86 ajungba anogomong nung Bhopal nung Rashtra Shakti Foundation-i Madhya Pradesh Chief Minister, Shivraj Singh Chouhan nem tetushi agütsüba noksa nung angur.

Climate Activist Disha Ravi-i Greta Thunberg nem Toolkit agütsü: Police

New Delhi, February 15 (Agencies): Hombarnü Delhi Police-i, climate activist Disha Ravi, advocate Nikita Jacob aser Shantanu nungeri aluyimertemi longkak aitba dak sendakba nung toolkit ka renemba sülen Sweden tsür climate activist, Greta Thunberg nem agütsü; iba sülen Greta-i ibaji twitter ajanga lemsatep, ta metetdaksü.

Toolkit ya tongtimbang onük ka rasa-a ashiba den külemi iba onük atema teinyaktsütem lemsatepba indang document ka lir.

Delhi Police-i, Disha-i ibaji edit süshiba sülen Greta Thunberg nem Telegram mobile application ajanga agütsü; Disha-isa iba toolkit lemsateptsü atema lai tentetba WhatsApp group ka delete süogo, ta metetdaksü.

"Disha, Shantanu aser Nikita nungeri toolkit ka yanglu. Disha-i toolkit ji Greta Thunberg nem Telegram app ajanga agütsü. Disha-isa iba

toolkit lemsateptsü atema tentetba WhatsApp group ka delete süogo. Inyakyim shidak benshia Disha puogo," ta Joint Commissioner of Police (Cyber), Prem Nath-i metetdaksü.

Nath-isa, Khalistan pusemba telok- Poetic Justice Foundation (PJF)-i ayongzükbba Zoom senden ka nung Nikita aser Shantanu nati aden, ta metetdaksü.

Delhi court kati Nikita Jacob anema non-bailable warrant agütsü, iba sülen Jacob-i Bombay High Court dang transit anticipatory bail temepishiba agütsü.

Honibarnü Delhi Police-i iba ken o nung Bengaluru nung Disha Ravi apuba sülen Delhi court kati la anogo pongunü atema police ket nung agütsü.

India nung aluyimertemi longkak aitba tesashiba kümdaktsütsü atema Greta Thunberg-i asalentong yanglua toolkit ya yangludaktsü ta bilemer.



February 15, 2021 nü Bijnor district nung Congress National General Secretary, Priyanka Gandhi Vadra-i 'Kisan Mahapanchayat' senden nung aluyimertem pusema jembiba noksa nung angur.

Karnataka nung TV, fridge aser bike alir dang BPL card meyipa meshir

Belagavi (Karnataka), February 15 (Agencies): Hombarnü Karnataka state sorkari nüburtem dang, motorbike/scooter alirtem, TV, fridge mesüra ali acre 5 dak tema alirtemi March 31, 2021 anogo tashi nung Below Poverty Line (BPL) ration cards meyipa agüjang, mesüra temerenshi agütsütsü, ta metetdaksüogo.

"BPL ration card alitsü atema telatetba ka lir. Parnok ket nung ali acre 5 dak tema malitsüla, motorcycle, TV mesüra fridge malitsüla," ta sorkari metetdaksü.

"Item telatetba kübok malirtemi BPL cards meyipa agütsütsüla, mesüra onoki ibaji inyaktsü," ta Karnataka Food & Civil Supplies Minister, Umesh Katti-i metetdaksü.

Hombarnü Belagavi yimti nung osangbenertem senden ka nung jembidang Minister-i, küm ka nung sen lakh 1.20 dak tema angurtemi BPL cards mamshitsüla aser March 31 tashi nung meyipa agütsütsüla,

ta metetdaksü.

Congress party-ibo ibaji aitsüogo aser party nung inyakertemi Bengaluru nung aliba ration shops nung adenshir longkak aita liasü.

Party nung inyakertemisa Dharwad, Mysuru aser Tumakuru nung aliba ration shops nunga longkak aitogo, ta Congress lenir kati metetdaksü.

Congress MLA, U T Khader-i, taoba Chief Minister Siddaramaiah-i aniba sorkar kübok pa food & civil supplies minister inyakba mapang nunga iba onük benoka liasü, ajisüaka ibaji ajanga sensakertem aika kongshitsü asüba agi tenati iba telemetba magi, ta metetdaksü.

Pai ashiba agi, sensaker süaka sen tetemlok (interest) magii loan ngura parnoki TV, fridge aser motorbikes aliteter.

Sorkari sensakertem anema inyaker, sorkari iba tajangzüknisung timba nem agütsütsü merangtsüla, ajisüaka nisungtem ket nungi BPL cards meyipa meshitsü meranger, ta aitsü.

Aung San Suu Kyi maneni sota ayutsü telemtetba agi



Yangon, Tsüklai/February 15 (Agencies): Myanmar indang military lenirtemi lenir Aung San Suu Kyi maneni sota ayutsü telemtetba agiogo. La Hombarnü chiochtsü liasü, aser longkak aiterem takhangba rongnung la chiochtsü atema akhangba ya takhangba tongtibang rongnung ka lir.

Suu Kyi February 17 nü tashi sota ayutsü aser iba anogo la okadak videoconference ka ajanga shilem agitsü akok, ta Suu Kyi'er party-i la tenüing nung nokdachtsü asoshi asüingdangba obendanger Khin Maung Zaw-i ashi.

Suu Kyi maneni sota ayutsü atema telemtetba agiba ajanga military aser longkak aiterem tsüingda mepetmesü tulu adoktsü akok. February 1 nü military-i sorkar atsüingba sülen nüburtemi yimti balala nung longkak aita arudar.

Hombarnüa Myanmar kübok tesem balala nung nüburtem adenshia longkak aitogo. Deobar aonung ketdangsertemi linük nung internet shibangtsüba den longkak aitba sentong nokdangtsü asoshi tongtibang yimtitem nung security akangshiaka Hombarnü longkak aiterem maneni aika adenshia shilem agiogo.

Mandalay yimti yimtong nung engineer tem meyrejang

aika adenshia longkak ait. Parnoki "Onok lenir chiokang," "ochinba asoshi shibasa nokdachtsü?" aser "ayaterem nung ozüing alema nüburtem apuba anenang," ta olong balala zülua bener longkak aita liasü.

Internet shibangtsüba aser yimti yimtong nung military gari dena anendena aliba osang angazükba sülen Hombarnü linük nung nütsüingyongsük timba aliba yimti Yangon nung longkak aiterem aikabo madenshi. Ajisüaka anti-coup demonstrators noklang aika Central Bank of Myanmar building kima longkak aita liasü, kong military garitem nung sepai sung mener liasü aser iba den riot police, water-cannon trucks aser armored personnel carriers tema anendena liasü.

Longkak aitertemi " # S u p p o r t C D M #SaveMyanmar" ta zülua bener longkak ait. CDM tetezü civil disobedience movement lir aser iba sentong kübok Myanmar nung doctor, engineer aser wadang balala nung inyakertemi, military-i election ajanga shimba yimden yimsüsürtem mechiok tashi aser linük nung civilian yimsüsüba tanaben mebenok tashi mapa-i maotsü mulungteter shilem agidar.

Longkak aiterem karibo military garitem anasa "CDM

nung denang" ta zülua bener noksa tangokba nguogo.

Military-i sorkar atsüingba mapang parnoki Suu Kyi aser lai aniba sorkar kübok züingsemtem pua ayu aser Parliament tasen ka tenzüchtsü atema tawa shimba ozüing yanglurtem nem temelaba magütsüi nokdang. Senior Gen. Min Aung Hlaing lenisüba kübok junta-i ashiba agi, taoba küm election agiba nung ochi mashi inyakyim densema aliba sorkari junga bushitsüingdang masüba ajanga parnoki sorkar atsüingba aküm, koba Suu Kyi-i aniba National League for Democracy party-i koka liasü. Iba ken o dak sendakba nung state election commission-i ochi mashi inyakyim densema aliba kuli tejangja kecha mali ta shiogo.

Deobarnü Ministry of Transport and Communications nungi asütsü ta bilemba tetuyuba ka ajanga mobile phone service agütsürtem dang Hombarnü anepdang 1:00 ako nungi 9:00 ako tashi internet connection shibanga ayutsü tetuyuba agütsü. Iba osang ya social media nung ayimsünga prokshi aser kasaji service provider Oredoo Myanmar nungia osang agüja liasü.

Deobrnü United States aser Canada aser Europe nung linük 12 nungi ambassador temi Myanmar indang security forces dang, nüburtemi shimba sorkar atsüingtokba anema longkak aiterem dak tamajung beshitsü nungi pilaa alitsü mepeshia liasü.

Parnoki lenirtem aser activists tem apuba aitsüba den communications nung military-i jushiba atema aija liasü.

"Democracy, nüjiso, yimjung aser tesunep atema Myanmar nung nüburtemi nokdakba onoki pusemer. Alimai nenok repringdar," ta parnoki külem sangdong ka ajanga metetdachtsü.

Congo anüdoklen Islamist teloki nisung 16 tepset

Beni, Tsüklai/February 15 (Agencies): Democratic Republic of Congo northeast tsütsü Ituri province kübok yimtsüing ka nung Islamist teloki sepai asem aser civilian 13 tepset aser tekülem ki ka rongdoktsü, ta army aser rights group temi Hombarnü ashi.

Bunia yimti nungi kilometer 100 shi pilar aliba Ndalya yimtsüing lendong agütsürtem Deobarnep aita injang khaloktsü tenzük, ta Convention for the Respect of Human Rights indang coordinator Christophe Munyanderu-i ashi.

Lendong atalokli asadangba nung civilian 13 tepsetba sayuogo, ta Munyanderu-i ashi. Lendong agütsürtemi Catholic tenlaki ka rongdoktsü, ta paisa ashi.

"Tang atema lendong agütsüba sülen sepaitemi iba yimtsüing amokbanga lir, kong civilian takum jenti laluogo. Mitkartemi parnok den

meyiper raraba mapang sepai asem aser lendong agütsür pezü tepset," ta army odongtar Jules Ngongo Tshikudi-i ashi.

Tang tashi shirnoki iba lendong ya agütsüar ano mejangjateti lir, saka Tshikudi-i Allied Democratic Forces (ADF) tenüing asener. Allied Democratic Forces ya Uganda nung telungpur telok ka lir, koba Congo anüdoklen 1990s nungi kanga yakyaka arur.

Taoba küm iba telok yagi nisung 850 shi tepsetogo, ta UN ajanga asadangteta lir.

Congo anüdoklen Uganda, Rwanda aser Burundi den arrtsüa lir, kong telungpur telok 100 dak tema lir.

Taoba mapanga Allied Democratic Forces ajanga inyak südi ta temolung melemi bilema aliba lendong aika Islamic State temi tenüing agia aruogo, saka telok ana tsüingta tesendaktep aliba mangur, ta UN nung mongintemi ashir.

Guinea nung nisung asem asüba sülen Ebola epidemic sangdong

Conakry, Tsüklai/February 15 (Agencies): Guinea linük southeast tsütsü nisung asem sür ano nisung pezü shirangba sülen Ebola epidemic sangdongogo.

Liberia arrtsü anasa Goueke tesem nung nisung tasüming aremba sentong ka nung adenba sülen nisung tenet tepok ao, saksü aser azü yima shirang. Tashidak mena aliba nisungtem ya temang anepalutsü atema tesem balala nung yua lir, ta health ministry ajanga Deobarnü ashi.

"Iba tensa ajuruba den külemi international health regulations nung shia aliba ama Guinea sorkari Ebola epidemic sangdonger," ta ministry ajanga sangdong ka nung ashi.

Nisung asüba asoshi ketdangsürtem kanga shisabulur, ta Health Minister Remy Laham-i ashi. Guinea nung iba tashidak tenzüka 2013 nungi 2016 tsüingta West Africa nung nisung 11,300 asüba sülen iba tashidak agi tang mezüingbuba asür. Iba tashidak ya timba Guinea, Liberia aser Sierra Leone nung liasü.

Tang tesüsa putetba Ebola tashidak tali jangjashitsü atema anaben tendanga liasü aser health worker temi tsüingsü pua shiranger den ajurutepa alirtem tesem balaka nung ayur, ta state

health agency ANSS ajanga ashi.

Ebola mozü alitsü atema Guinea-i World Health Organization (WHO) aser danga international health agency tem den tongteprateptsü, ta ashir. Iba mozü yagi takum kumzükbatsü tajung lir.

Guinea nung Ebola tashidak tanaben tenzükshiba ya khuret tulu lir, ta HO Regional Director for Africa, Dr Matshidiso Moeti-i ashi.

"Guinea nung aliba health ketdangsürtemi arrsanga iba virus pua orr tali menatempa aoba nungi azüoktsü meranger. WHO-ia ketdangsürtem tetendangba, tsüingsü apuba aser anepaluba nung yariteper," ta lai ashi.

Iba virus ya nisung dak komasür menalokar ano mejangja, ta International Federation of Red Cross and Red Crescent Societies nungi Dr Yuma Taïdo-i Guinea yimtiba, Conakry nungi osangbener dang ashi.

Democratic Republic of Congo nunga ketdangsürtemi iba tashidak samaogo ta sangdonger ita asem lir Deobarnü North Kivu province nung case pezübuba jangjatet.

Ebola mozü tesem ajungalen amshiba ajanga iba tashidak ya azüokteta liasü, koba nisung 40,000 dak tema nem agütsüogo.



Roscosmos Space Agency Press Service ajanga agütsüba noksa ka nung khu abenba Progress MS-16 ka Baikonur, Kazakhstan nung Russia indang space facility nungi anünglaki khaketa yokba angur. Russian Progress MS-16 cargo ship ya Kazakhstan nung aliba Baikonur nungi International Space Station-i aposuogo.



Longsa Baptist Arogo-i achaayanga Tsüklai 13 & 14 Longsa mejensanger yimden yimsüsür asoshi shisatokden sentong "Tayimjem Yimsüsür" omen dak rangloker akaba mapang tangokba noksa nung angur. Iba sentong nung taoba Dimapur Govt. College Principal, Wb. Akok Walling aser IEF Missionary Wt. Mapula na shisalen sayur liasü. Mokochung, February 15, 2021.

India nung Samsung Galaxy F62 sayaogo

New Delhi, Tsüklai/February 15, 2021 (Agencies): Hombarnü, Samsung-i India nung mid-range smartphone - Samsung Galaxy F62 sayaba sangdongogo.

Taoba küm October ita Samsung Galaxy F41 sayaba sülen, Samsung Galaxy F62 ya Galaxy F-series nung company indang smartphone tanabuba alitsü. Samsung Galaxy F62

nung 7nm Exynos 9825 processor aser quad rear camera setup inoka yanglutsüogo. Iba smartphone ya February 22 nü nungi tenzüka Flipkart ajanga angutsü.

India nung Samsung Galaxy F62 - 6GB RAM + 128GB storage variant jenjang sen

23,999 aser 8GB RAM + 128GB storage variant jenjang sen 25,999 alitsü. Iba smartphone ya Flipkart aser Samsung indang official store ajanga angutsü. 'Introductory offer' ama ICICI Bank Credit

meiyong Exynos 9825 chipset den 8GB RAM aser 128GB internal storage ajanga achaayangtsür. Iba smartphone nung 6.7-inch Super AMOLED Infinity-O display den full-HD+ resolution keta lir. Iba den

bendenloksema, Samsung Galaxy F62 nung 7,000mAh battery angutsü aser fast charging support asür. Camera atema, Samsung Galaxy F62 tesülen quad

asert Debit card amshia alirtem atema Samsung-i sen 2,500 discount agütsütsü terenemba lir. Samsung Galaxy F62 smartphone ya sentsü asem - radiant green, radiant blue, aser radiant grey nunge angutsü.

Specification tsütsü reprangdangra, Samsung Galaxy F62 ya Samsung



camera setup imoktsüogo. Iba set-up nung 64-megapixel primary shooter, 12-megapixel ultra-wide-angle lens, 5-megapixel depth sensor aser 5-megapixel macro lens dena lir. Selfie atema smartphone tejaklen 32-megapixel selfie shooter den 4K video recording feature angutsü.

Zunheboto nung COVID-19 mozü indang awareness sentong agi



Dr. Nukshisangla Jamir, DPO (RCH & UIP), Zunheboto ajanga 8th NAP B Coy pur den February 12, 2021 nü COVID-19 mozü indang awareness sentong nung jembiba mapang tangokba noksa nung angur.

Dimapur, Tsüklai/February 15 (TYO): Zunheboto district nung aliba 8th NAP B Coy pur nem COVID-19 vaccination indang awareness aser sensitization sentong ka February 12, 2021 nü ayongzüjka liasü.

Dr. Nukshisangla Jamir DPO (RCH/UIP), Zunheboto ajanga iba sentong nung shilem agir ajak dang molungsoa arua mozü ya agitsü ayongzüik aser iba maongka amajok nung melalutsü ashi. Laisa shilem agir ajak dang mozü agitsü aser

social media nungi mozü atema tiazü olulu prokshiba nung mamangtsü ashi.

Dr. Nukshisangla Jamir-isa Covishield mozü aser mozü doses agütsüba indang tejangja rateta ashi. Pai takum kumzükbakisung masü saka kinunger aser kidanger takum kumzüksü mechi mozü ya agitsüla, kechiaser frontline worker tem iba tashidak menatsü temelaba lir, ta lai ashi.

Nagaland nung healthcare worker tem tang tashinung iba mozü agir aliba indang osang tejangja laisa agütsü, aser Zunheboto nunga healthcare worker tem iba mozü agir aliba indang lai lemsatop.

Iba awareness sentong nung Tongpang, Asstt. Commandant, 8th NAP, B Coy, Zunheboto ajanga tarur pela agizükba o jembia liasü.

Iba sentong tembangba sülen shisalen sayur den sensaksemba mapang liasü.

STATE URBAN DEVELOPMENT AGENCY

Govt. of Nagaland

MAKAR SKILLS DEVELOPMENT AND SERVICES

Registration opens: 13th February, 2021

Registration closes: 27th February, 2021

Documents required:

- Aadhar Card Photocopy
- Class X/XII Marksheet Photocopy
- 3 Passport Photographs
- Bank Passbook Photocopy

Free course on Computing and Peripheral. Limited Seats Available

Location: T. ANGAMI BUILDING, MIDLAND, OPPOSITE NEPALI GAON GATE, DIMAPUR : NAGALAND

Contact: 7628972741 / 8257011913

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajsüaka, tang **Kabiraj H. Umar Chesam** contact no. 7627917983 / 7627998690 Address: Near Nagaland Gate, Lahorijan K/A Assam, tetuyuba nung anidaka surgery kecha magii (non-surgical) anepalur anogo ishika tsünga ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM (Friday & Sunday only) Yours sincerely - Khaming, Add: 7th Mile, Dimapur



Mon nung "Awareness Scooty Rally" agiogo



Mon, Tsüklai/February 15, 2021 (TYO): District Administration aser Transport Department den Nasha Mukta Bharat Abhiyan, Mon longjemer Hombarnü (15.02.2021) "Awareness Scooty Rally" sentong ka ayonga agiogo. Iba rally ya NST Junction Mon nungi ADC, Mon HQ, Rahul Mali, IAS-i tenzüksü.

Awareness Scooty Rally sentong nung tetsür rider 20 agi shilem agiogo aser District Administration-i rally nung shilem agirtem meina (escort) ao. "Yes to Life, no to Substance Abuse" omen nung ajemdaker, temesepba

chiyongtsü amshiba dak sendakba nung nübur dang tekümdangtsü agütsütsü nükjidong yur iba rally ayongzüik. Temesepba chiyongtsü meindoktetba timtem mesüra talenba nung alirtem tebilemba angadangtsü mechi, iba sentong nung Helpline Number 8415967564 ajener aliba pamphlet tem lema agütsü.

Kasa mapang, Transport Department indang "Road Safety Month" den liromedema, 'road safety' mera balala indang placard alemba den tekümdangtsü osangtem sangoktsüogo, ta sangdong ajanga metetdaksü.

April 9 nü 'Karnan' sayatsü

Mumbai, Tsüklai/February 15, 2021 (Agencies): Deobarnü nungtugu South star Dhanush-i Twitter sabang ajanga Karnan film indang poster den külemi iba film sayatsü anogo sangdongogo. Theatre nung iba film ya April 9, 2021 sayatsü.

Dhanush-i pa indang taruba Tamil film Karnan ya alima ajunga nung April 9 nü sayatsü ta sangdongogo. Iba film ya action-drama ka alitsü, koba Pariyerum Perumal film yanglusang Mari Selvaraj-i direct süogo.

Iba film poster nung Asuran star Dhanush teka nung handcuff inoker, tekolak aser teka nungi azü yima aliba sayur. "The soul of justice never dies," ta asüba olen poster nungji ajena lir.

Iba movie ya tanga sabang ajanga sayatsü lenmang balala liaka, theatre nungang iba film sayatsü lemteba agi, taoba ita, Dhanush-i iba film producer Kalaippuli S Thanu dang pelaba metetdaksüogo.

"April 2021 nung theatre ajanga 'Karnan' sayatsü. Mapang tetemjen ka nung nungdaka aliba maparen ka inyaker. Tanga lenmang balala liaka, theatre kibur, distributor, exhibitor aser tangar shirnok film aser theatre tem nung metaloker alir, parnok atema bilemtsüba asoshi nü (Kalaippuli) dang kanga pelar," ta Dhanush-i lemsatop.

"Fans ajak tenüng nung Kalaippuli sir dang pelaba shisemer, parnok (fans) atema iba ya kanga tongtibang lir," ta Dhanush-i ashi.

Maneni, iba film dak alia, Dhanush-i director Karthik Subbaraj indang action-thriller Jagame Thanthiram sayatsü atadar. 2013 küm Dhanush-i mezünga hindi fm - Raanjhanana nung Aanand L Rai den külemi inyakba sülen Atrangi Re nung pai tanaben film yanglur Rai den longjemba angutsü. Dhanush-i tesüsa shilem agiba Hindi film rongnung Shamitabh alitsü, koba 2015 küm saya.

AO: Nadal, Medvedev aser Rublev nungeri takok angu

Tsüklai/February 15, 2021 (Agencies): Hombarnü Australia open tebur kija asaya nung Rafa Nadal-i 6-3 6-4 6-2 agi Fabio Fognini madak takok ngua quarter-finals-i iogo.

2015 U.S. Open nung pa tsüingdaksüba asayar den asayaba mapang Nadal-i point ka asoshi mapang talanglang masayatsü atema kanga junga counter süa asaya.

Tena tsüingda ghonda ana ser minute 16 asaya aser tanabuba set nungubo Nadal 4-2 agi tesülen liasü saka pai menepa atua asaya akok.

Iba sülen tatembangbuba set nungbo Nadal-i asaya ayong ayonga koka QF-i iogo. Pa taruba asaya nung Stefanos Tsitsipas mesera Matteo Berrettini den asayatsü.

Tanga asaya ka nung Australian Open akoktsü imlartem rongnung densema aliba Russia nunger asayar Daniil Medvedev-i, 6-4 6-2 6-

3 agi Mackenzie McDonald koka quarter final-i iogo. Pai tang tashi nung asaya 18 nung khien danga tamakok mongui asayaa arudar.

World number 192 McDonald-i net nung junga asaya saka pa atema Medvedev indang serve kanga tajang liasü.

Medvedev-i break points tenet nungi trok akok aser pa taruba asaya külem Russia nunger asayar Andrey Rublev den asayatsü jangjaogo.

Australian Open quarter-final nung Daniil Medvedev den asayatsü atema maongka ngutetba sülen Andrey Rublev-i Grand Slam nung Russia atema otsü tasen ka yanglutsü ajangzüktetogo.

Qualifier Aslan Karatsev-i yashi asaya koka Grigor Dimitrov den asayatsü jangjaogo aser iba tetezü 1968 küm Open era tenzükbä sülen last eight nung tang

mezüingbuba Russia nunger asemi shilem agitsü.

Hombarnü asaya nung Rublev-i, 6-2, 7-6 (7/3) agi Norway nunger asayar Casper Ruud akok. Ruud yirua asaya nungi tuguatokba sülen pai asaya akok.

"Küna rongnung kabosa semi-finals-i aitsü, anungji iba ya osang tajung lir, saka asaya kanga toktepa asayatsü," ta Rublev-i ashi.

"Taoba mapang pai ni US Open quarters nung tsükdaksüogo. Tang ano küna Australian Open nung asayatsü, anungji repringdanga atadi," ta pai shisem.

Rublev-i toba küma Roland Garros quarter-finals tongtetogo aser ATP Tour titles pongu tashi koka liasü.

Russia nunger rongnungi tatemsa Marat Safin-i Grand Slam ka koka lir. Pai 2005 küm Australia Open koka liasü.

AR-i ayonga Kohima nung cricket asaya



Dimapur, Tsüklai/February 15 (Agencies):

'Sports Friendly North East' omen dak ajemdaker HQ IGAR (North) tawabangba kübok Assam Rifles-i, Army & Assam Rifles Officers aser All India Civil Officers tsüingda Kohima nung February 14 nü friendly cricket asaya ka ayonga asayaogo.

Iba asaya ya Nagaland Cricket Association (NCA)

den longjemer Phesama Police Reserve ground nung asayaa liasü. Asaya nung civil officers' team-i over 20 nung run 169 yanglu, ajisüaka Assam rifles team-i, ball ka anunga lir civil officers' temi yangluba run menepa asaya akok. Asaya nung team spirit aser telongjem sayuba ajaki kanga tenüngsanga agizükogo.

ICC T20I rankings: KL Rahul tanabuba jenjangi tuogo

Dubai, Tsüklai/February 15 (Agencies): Hombarnü sayaba ICC men's T20I rankings (batsmen) nung India nunger asayar KL Rahul jenjang ka tejakdangi tua tanabuba tongogo aser kasa mapang nung captain Virat Kohli maneni jenjang tenetbuba nung lir.

Rating points 816 nguteta Rahul tang temaba jenjang nung aliba England nunger asayar Dawid Malan (915) sülen tanabuba jenjang nung lir aser kasa mapang nung Kohli-i point 697 nguteta lir.

Australia white-ball skipper Aaron Finch (808) jenjang asemububa nung lir aser Pakistan captain Babar Azam (801) jenjang pezübubai asepzüka luogo.

Top-10 nung India nunger batsmen tem rongnungi Rahul aser Kohli na dang densema lir. Hombarnü sayaba bowler aser all-rounder T20I rankings top

10 nung India nunger asayar ka danga densema mali.

Bowler tem rongnung South Africa nunger spinner Tabraiz Shamsi-i tang mezüingbuba jenjang anabuba tongtetogo aser kasa mapang nung Pakistan wicketkeeper-batsman Mohammad Rizwan-i SA 2-1 agi akokba asaya nung kanga junga asayaba sülen pa jenjang 42buba tongogo.

Iba asayamung nung Shamsi-i wicket trok agiba (kong final nung run 25 agütsür wicket pezü agiba densema lir) sülen pai Australia nunger Adam Zampa, England nunger Adil Rashid aser Afghanistan nunger bowler Mujeeb Ur Rahman ajateta janjang anabuba tongtetogo.

Kasa mapang nung Pakistan nunger asayar Haider Ali jenjang 13 tejakdangi tua jenjang 137 tongogo aser fast bowlers Shaheen Afridi (11)

aser Hasan Ali (82), aser spinners Mohammad Nawaz (64) aser Usman Qadir (92) nungera tejakdangi tuogo.

South Africa nunger asayar Reeza Hendricks-i asayamung nung run 98 yanglua pa jenjang tenet tejakdangi tuogo aser tang jenjang 17buba nung lir. Maneni David Miller-i run 116 yangluba sülen pa jenjang tenet tejakdangi tua jenjang 22buba nung lir.

Fast bowler Dwaine Pretorius-a jenjang 121 nung aliba jenjang 51bubai tuogo.

Pakistan aser South Africa na asayamung tembangba sülen team ranking nung kecha temelenshi mali.

Pakistan-i point ka ngutetogo, saka parnok maneni jenjang pezübuba nung lir. Kasa mapang nung South Africa point ka agi tajemba aküm saka parnoka maneni jenjang pongububa nung lir.

Yuvraj Singh anema FIR benok

Hisar, Tsüklai/February 15 (Agencies): Taoba küm Instagram chat ka nung Yuzvendra Chahal anema pa indang cast dak ajemdaker jembiba sülen taoba India nunger cricket asayar Yuvraj Singh anema Haryana Police-i FIR ka benokogo.

Indian vice-captain Rohit Sharma den Instagram live sessions ka nung Yuvraj-i, Chahal indang social media posts anema jembiba.

Singh-i, iba olen jembiba atema tatok meshiogo aser ashiba agi, pai asa mesüi nüburtem temulung yirudaksüogo.

"Obendanger Rajat Kalsan-

i Hansi Police Station nung ken o ka benokba sülen Yuvraj Singh anema FIR ka benokogo," ta Hansi Superintendent of Police, Nikita Gahlaut-i Hombarnü ashi.

Lai ashiba agi, iba ken o ya IPC aser SC/ST (Prevention of Atrocities) Act kübok provision balala dak ajemdaker Deobarnü benok.

Kalsan-i iba tashishiba ya taoba küm police nem agüja liasü. Police-i ashiba agi, FIR ya IPC sections 153 (giving provocation with intent to cause riot), 153 A (promoting enmity between different groups on grounds of religion, race, place of birth, residence, language,

etc.) aser SC/ST (Prevention of Atrocities), Act dak ajemdaker benok.

Kalsan-i, Singh-i jembiba o ajanga Dalit nunger yirutsüogo, ta ashiba den nisung aikati social media nung iba video ya repringogo, ta ashi.

Obendangerisa Haryana Home Minister Anil Vij dang iba ken o ashishiogo, shibai Haryana Director General of Police dang jenjang tapet agitsü tuyua liasü.

Maneni Kalsan-i, Hisar nung SC/ST Act kübok amenokba special court ka nung ken o benokogo. Okadak ajanga Hansi police dang ken o indang status report meshiogo.

Gopichand den kecha mangatettep mali: Sindhu



Tsüklai/February 15, 2021 (Agencies):

PV Sindhu-i, Gopichand academy toktsür Gachibowli indoor stadium, Hyderabad nung training agitsü telemtetba agiba sülen osang balala ajanga la national coach Pullela Gopichand den mangatettep alitsü akok ta sangdongba lai jangjashitsüogo.

"Ni Gopichand den kecha mangatettep mali. Küna tsüingda tesendaktep junga lir," ta lai Times of India dang ashi

"Ni Gopichand academy nung masau saka Gachibowli indoor stadium nung kü indang South Korea nunger coach Park Tae Sang den Tokyo Olympics tashi training agitsü. Ajisüaka ni iba telemtetba agiba ya mashiyimi mangatettsüla," ta Sindhu-i ashi.

Taoba hopta Sindhu-i Gopichand Academy toktsüba ya psychological reasons kar aliba ajanga lir, kechiyong

Gachibowli Stadium nung asayaba ya world-class venue ka nung asayaba ama lir, ta sangdonga liasü.

Taoba hopta Sindhu tebu PV Ramanna-i, Gopichand den kecha mangatettep mali ta shiogo. "La Gopichand den mepila, saka Olympic arena ka nung training agiba ama bilema asayaba tesem nung nung lai asayaner. Sports Authority of India (SAI) nungi temelaba agiba den Badminton Association of India (BAI) den angatetteper training agiba tesem melenshitsü telemtetba agiogo," ta Ramana-i IANS dang ashi.

Sindhu tang tashi 2021 Tokyo Olympic Games atema qualify mesüi lir, saka qualify asütsü ana nung lir. Olympics nung takok angutsü nükjidong nung la Korean coach Park Tae Sang den Mongolbarnü nungi training agi tenzüksü.

BILEMDANGANG

"Tejak tereprangtsü tajungji ajaki nükshir saka shisatsü tajungjibo ajaki meimer."